

1. **Hae God hem i bigfala bos** blong evri samting. Mo hem i laekem tumas olgeta samting we hem i mekem. Hem i mekem evri graon. Mo hem i mekem yumi blong yumi i stap andanit long hem mo blong yumi lukaotem olgeta samting we i stap long graon.

Mo oli talem se, "Yu yu Masta blong mifala, mo yu God blong mifala. Yu yu mekem olgeta samting evriwan. Mo from we yu yu wantem olsem, yu yu mekem olgeta, nao oli stap, mo oli gat laef." (Rev 4:11)

Be naoia i stap luk olsem we yumi no moa stap folemgud bigfala tingting ia blong Hae God.



2. **Yumi evriwan i agensem God**, mo yumi stap folem ol fasin mo wantem blong yumi nomo.

I luk olsem se yumi no save mekem gud laef blong yumi, mo yumi stap spolem graon, mo olgeta samting we God i mekem, mo yumi stap spolem ol narafala man tu.

I no gat wan man we i stret gud, i no gat wan man nating olsem. I no gat wan man we i haremsave God, mo i no gat wan man we i stap traem lukaot hem. Olgeta man oli tekem ol narafala rod finis, olgeta evriwan oli mekem i no stret. I no gat man we i stap mekem i gud, i no gat wan man nating olsem. (Rom 3:10-12)

Wanem tingting blong yu? God bae i mekem wanem long yumi ol man we yumi tanem baksaed blong yumi long hem?



3. **Hae God hem i no save livim yumi** blong yumi tanem baksaed blong yumi long hem olsem. Nogat! Bambae God i putum ol man we oli no save obei long hem long bigfala kot blong hem, mo bae hem i makem olgeta blong i ded long faea.

God i makemaot rod blong olgeta man finis. Faswan, bambae man i mas ded, mo biae, bambae God i jajem hem. (Hibrus 9:27)

Sore tumas, hemia wan kaen toktok we yumi no wantem harem nating, be yu wet, i gat wan gudfala nius i stap kam ...



4. **God i laekem tumas evri samting** we hem i bin mekem, ale hem i sanem stret pikinini blong hem Jisas Kraes, i kam long wol.

Fasin blong Jisas i no olsem yumi man long wol. Hem i no tanem baksaed long hem long God. Nogat. Hem i folemgud olgeta tingting blong God nomo. Be Jisas i ded, hem i kasem evri kros mo panis we God i makem blong yumi i kasem from ol stronghed fasin blong yumi.

Kraes we laef blong hem i stret olgeta, hem i tekem ples blong yufala we laef blong yufala i no stret, nao i ded blong tekemaot sin blong yufala blong tekem yufala i kam long God. Hem i ded wan taem nomo, we bambae i no moa save ded bakegen samtaem. (1 Pita 3:18)

Be stori ia i no finis long ples ia nomo...



5. **God i resemap Jisas long ded**, mo God i makem hem blong hem i nambawan bos blong evri ples long wol wetem evri samting we i stap long hem.

Jisas hem i winim paoa blong ded. Hem i laef bakegen. Nao hem i save givim niufala laef ia long yumi tu.

Bambae Jisas i kambak bakegen long wol, mo hem bae i jajem olgeta man mo woman long kot blong hem.

God ya, hem i sore tumas long yumi, nao from samting ya, hem i mekem we yumi bon bakegen, yumi gat niufala laef. (1 Pita 1:3)

Wanem tingting blong yu long gudfala toktok ia?



6. **I gat tufala rod we yumi man i stap folem.** Yu yu stap folem wijwan long tufala rod ia?

Wan :: Maet yumi stap folem tingting blong yumi nomo from we yumi tanem baksaed long yumi long Hae God. Mo sipos yumi stap mekem olsem, bambae yumi kasem stret panis long han blong God mo bae yumi ded nomo long faea.



7. **O maet yumi folem niufala rod blong God** we yumi folem tingting blong Jisas we hem nomo i Masta long laef blong yumi, Jisas i ded long kros from yumi, mo hem i laef bakegen long ded blong givim niufala laef long yumi tu. Sipos yumi putum tingting blong yumi long Jisas, bambae God i lego sin blong yumi, mo bae hem i givim laef long yumi we i nogat en blong hem.

Man we i bilif long Pikinini ya blong God, hem i gat laef ya we i no save finis. Be man we i no save obei long Pikinini ya, hem bambae i no save luk laef ya samtaem. Mo man olsem, God bambae i stap kros long hem olwe nomo. (Jon 3:36)



**Olsem wanem nao long laef blong yu wan?
Bambae yu yu folem wanem rod?**



Sipos yu yu glad blong folem tingting blong Jisas nomo, i gud blong yu talemaot long hem long wan prea. Talem long hem olsem we yu no moa wantem folem tingting blong yu wan. Yu no moa wantem stap olsem wan enemi blong God. Yu yu glad blong tekem Jisas olsem Masta long laef blong yu, mo blong yu letem hem i karemaot evri sin blong yu blong mekem yu yu kam wan stret pikinini blong God!

Sipos yu prea olsem, raetem nem blong yu long ples ia. **Nem:** _____ **Det:** _____

Hu Bae i Stap Bos
long laef blong yu?

